

## **Rapport dalla sessiun dil cussegl da vischnaunca dils 21-08-2017**

### **Tractanda 1**

### **Approbaziun dil protocol dalla sessiun dils 24-04-2017**

Il protocol dalla sessiun dils 24-04-2017 vegn approbaus en votaziun unanima cun engraziament.

### **Tractanda 2**

### **Informaziun Campadi Trun SA**

Il vicepresidente dalla societad acziunara Campadi Trun SA, Donat Nay, informescha il cussegl da vischnaunca davart igl emprem onn dil niev menaschi da campadi. Il cussegl da vischnaunca fa diever dalla pusseivladad da tschentar damondas.

### **Tractanda 3**

### **Revisiun parziala dalla legislaziun da pumpiers**

Enteifer ils emprems onns dil niev menaschi da pumpiers Sumvitg-Trun ei semussau ch'ei drova entginas midadas enteifer ils regulativs. In dils motivs principals per la revisiun parziala ei ch'il corp da pumpiers ha grev d'anflar novs pumpiers motivai. La cumissiun da fiug e la suprastanza communal vulan crear meglieras cundiziuns pils pumpiers ed aschia dar in signal che lur impurtonta lavur per la segirtad en nosa vischnaunca vegn apprezzada.

#### **a) Regulativ da pumpiers dalla vischnaunca da Trun**

La competenza da recrutar novs pumpiers duei vegnir surdada niev alla cumissiun da fiug e buca pli alla suprastanza communal. La taxa da cumpensaziun per personas che prestan negin survetsch activ duei la suprastanza communal saver fixar sin maximalmein frs. 500.- enstagl da maximalmein frs. 300.-.

**La revisiun parziala dil regulativ da pumpiers dalla vischnaunca da Trun vegn approbada cun 12 : 0 vuschs.**

#### **b) Ordinaziun da menaschi dil corp da pumpiers Sumvitg-Trun**

Enteifer l'ordinaziun vegn proponiu diversas midadas pertuccont las cumpetenzas dalla cumissiun da fiug e dil furier. Vinavon vegn stipulau exact tgei funcziunariss che fan part al commando da pumpiers.

**La revisiun parziala dall'ordinaziun da menaschi dil corp da pumpiers Sumvitg-Trun vegn approbada en votaziun unanima.**

#### **c) Reglament da schulda e castitgs dil corp da pumpiers Sumvitg-Trun**

La cumissiun da fiug e la suprastanza communal proponan d'alzar las salarisaziuns pils exerchezis e per las sedutas sin frs. 50.-. Plinavon succedan ulteriuras pintgas adattaziuns tier las indemnizaziuns.

**Cun 12 : 0 vuschs approbescha il cussegl da vischnaunca la revisiun dil reglament da schulda e castitgs dil corp da pumpiers Sumvitg-Trun.**

#### **Tractanda 4**

#### **Niev reglament da taxas tier la lescha da baghegiar**

Il regulativ da taxas per la lubientscha da baghegiar e pil diever da terren e da spazi d'aria public datescha agl onn 1979. La suprastanza communal propona al cussegl da vischnaunca d'abrogar quei regulativ da taxas e crear in reglament niev. La finamira principala ei d'adattar las taxas aschia che las entradas cuvieran ils cuosts digl uffeci da baghegiar diltuttafatg.

Il cussegl da vischnaunca repassa il reglament e meina discussiun davart divers artechels.

**Cun 12 : 0 vuschs approbescha il cussegl da vischnaunca il reglament da taxas tier la lescha da baghegiar. Il vegl regulativ da taxas che datescha als 21 da fevrer 1979 vegn abrogaus.**

#### **Tractanda 5**

#### **Pusseivladad da tschentar damondas**

Dalla pusseivladad da tschentar damondas vegn fatg diever.

**Per il cussegl da vischnaunca**

Il president  
Donat Albin

L'actuara  
Sandra Gautschi